



شعر عامه

کاس دموع .. واحد

نجوى السيد

رئيس مجلس الإدارة :

فاروق خورشيد

مقرر لجنة النشر :

أحمد الشيخ

الإشراف العام :

أحمد سويلم

تصميم الغلاف إهداء من :

الفنان إيهاب شاكر

الإهداء

إلى نبض قلبي وكرات دمي وأنفاسي صعوداً وهبوطاً، إلى
الامل الذي حلمت به وعندما أصبح حقيقة ملكت الدنيا كلها
حتى رأيت يتشقق فزالت الدنيا ومابها من بين يدي ولم أعد
أطمع في أن أمتلكها ثانية، وإنما تمنيت أن يعينني الصبر
والإيمان على الفوز بالغفران لعل دعائي يصبح مستجاباً فتعود
للحلم قوته ويمتد بإنن الله تعالى عمره.

كاس دموع.. واحد

ساعات

تتلخبط الألوان

بتشخبط الحكايات

تهرب معانيها

وتتوه أساميها

ونلف وندور

علشان نعود بيها

● ● ●

العمر كام فرحه

علشان نحزن كل فرحة تهل؟

ونسلف الدمعات..

لكل عين بتطل؟

ياقلبي يعطشان

للضحكة لما ترن
من صوت ضنايا
بعد ما بيئن
الفرح ليه..
بيفرق الشربات
ولحدى.. ويفوتنى؟
من يوم ماتبت دا الالم فى ابنى
والفرح بيعدى
شايلى كاسات شربات
لكن ما يحسبني.
وضنايا بده ف كاس
وعينه تعاتبني
ناديت وقلت: يا فرح..
يا فرح هات له كاس
وتعالى حاسبني.
راح.. ما التفت لينا
والناس حوالينا..
غرقانه فى الشربات
خذت الضنى فى حضنى
وجريت.. ورحت وراه
وفضلت أترجاه
يدينى كاس فرجه
علشان عيون الواد.
وهو مش دارى
ويملئ كاس ورا كاس

ويراضى كل الناس
واما التفت لنا
ماكانش باقى معاه
غير كاس دموع واحد
وكاسات كتير فاضيه.

١٩٩٧/٨/٣

طاقة في السما

أنا وابني.. أول فرحتي
رسمنا أحلامنا.. وعشنا بعضها
علمني ضحكك..
أصفي من لون السما
علمني بسمه..
أحلى من وشم القمر
علمني أنسى أي هم.. وأي خوف
أول مايتكلم ويعزف بالنغم
فجأه:
لقينا كل ده..
صابه الخريف
لما عرف ابني..
أسامي للأطبا والدوا

لما القدر..
قدم لى أصعب إمتحان
واختار - بلا رحمه - المرض:
مع الولد.
لفينا.. ماخلينا ولا يافطة طبيب
وأطبا ياما تعتذر
وأطبا توصى بالسفر
كان نفسه مره يطير
مع طيور السما
يركب فى طياره
ويوصل للسحاب
إتحقق الحلم الغريب
وإبنى بيفتش على إسم الدوا
بين البلاد
مازلت أنا وهو سوا
بنقطع المسافات
ونحبس الدمعات
ونطلق الدمعات
لحد ماننول الشفا
يانبض قلبى..
ياللى بتحف الضنا
لسانى ماسكه فى الحبال
لسانى حتى اللحظة دى..
متمسكه بطوق النجاه

لسانى بادعى
حتى اشعر بالامان
واتمنى طاقة فى السما..
يوم تنفتح
قبلن ماقلبي يندبح.

١٩٩٥ / ٧ / ١٠

أمر الطبيب

(١)

محروم ضنايا م البكا بأمر الطبيب
وازاي اسامح نفسي..
لو دمعى انفرط؟
قال لى الضنى:
(إدعى لى يا امه
لجل أشفى م المرض
إدعى لى يسمح لى طيبى بالبكا
بدى أفضفض حتى أقدر أرتوى
خوفنى ليه يا امه الطبيب؟
ادعى لى..
يمكن يوم أطيب
وابكى ساعتها - يا امه - من كتر الفرح)

حاوطته بالدراعات وبالنبضات
ميلت راسى حتى باست جبهته
حسيت بقلبي بينخلع
حسيت عروقى بتنقطع
حسيت بأنى
بدى أدخل جوه مخ ضنايا
واخرج بالوجع
أه....

ياحى ياقيوم
وحدك تهد جبال
وحدك تقيم سماوات
وللمرض حكمه
وللشفا أوقات
لسانى صابره حتى تأمر بالشفا
لساه صبور الواد
إرحم ضنى
وارحمنى انا
دا انا بدى أصرخ..
حتى صوتى يتنبع
بدى أنهنه بالبكا
وازاي ابيع صبرى... وضناى
لسه صبور؟
إزاي أفرط فى الدموع
وعيون ضنايا مفرطت؟
إزاي اطل عليه

واقرا شكاوى عينيه
ولا يلقي عندي الحل؟
والقاء ساعات حيمل
أملأ له كاس الصبر واديله
وأصلي.. وادعيله
وأسلسل الدمعات
لكن ساعات..
تهرب.

(٢)

حكي لي..
قال لي : (يا أمي
شاهدت بنفسى سيل دمي
وأنا في غرفة الإشعاع
أوامر طول عشر ساعات
ثقيلة خطوة الأوقات
وأنا بين الجهاز ولسان فرنساوي
قالولي يا أمي حيداوي..
علل عندي ماهش سهله)
بلعت دموعي قبل ماتجري وتخوني
وقلت يا ولدي يا ضنايا
دا ريك عمره مايخذل
ويمهل.. بس مايهمل
وإد ماكنت باملالك

كاسات الصبر.. ويتشرب
مسير ربك يكافك بالدوا يا ابني
ويقبل مني.. يكافنتي على صبري
دا ربك عمره مايظلم
ومين يعلم!!!
يجوز واحنا بنتكلم.. ونتالم
يشاء ربك..
تكون شافي ومتعافي
لاعمرك يا ضنايا تمل
ولا عمرى فى يوم راح اكل
لغاية ربنا مايشاء
ويشفى الداء
نطق ولدى.. وقال لى:
(ياريت..
صحيح يا امه..
سالتى قلبك الصانق..
وقال حاشفى؟؟)
ف ثانية: قلت له: طبعاً
وخبيت العيون عنه
سالتى ليه باخبيها
وحلفنى
أقول له إيه اللى انا حاساه
صحيح راح يشفى من داؤه؟
صرخت وقلت له: يعلم بدا ربى
ويعلم باللى فى قلبى

مادام الرب رب قلوب
يكون مكتوب
شفاك يا ابني.

(٣)

ياحي .. ياقيوم
إشفي ضنايا م المرض
رجعني وف حضني الولد..
لدار .. وللأحباب
يا من تقول للشئ كن.. فيكون
يارب هذا الكون
كلّ خطانا بالنجاح والنصر
ورينا بعد الليل
جمال عيون الفجر
دا احنا بقالنا عمر
واحنا.. مش إحنا
والحزن دابحنا
ومخزنيته جوه نبض القلب
واللي مايعرفش حكاية الولد
يتمنى يبقى احنا
مهما نشيل : صبره يكتافنا
واللي يشوفنا ينبهر بينا
لاهم.. ولا أوجاع
وتشتكى لنا الناس
من قسوة الايام

لأن جالها زكام
رقدها ف سريرها..
وحرمة م الفسحة.
نطيب خاطر
وندعى ربي يعين
يقولوننا:
مهو أصلكم
بالهم مش حاسين
نجاح يجر نجاح
وحظوظ تكفى سنين.

(٤)

وأفوق على ولدى
وهو بيقول لى:
كفايه يا أمى..
إنى لا أقدر..
زى غيرى أطلق الأحزان
واريح النبضات.
ولا زى كل الناس
أفرح.. وأفرق
فى الكاسات شريات.

١٩٩٥/٨/١٥

نجوى

خايفه يا قلمي اجرى بيك..
فوق السطور
لتقول على اللي مختفى
فى كل يوم:
أطل ف عينيك يا قلم
أفك تنادينى
وبدك تنطلق
أهرب..
وما اطل ف عينيك
من يوم ما إبنى صابه سهم من القدر
وانا بانقتل
وخايفه ابوح
قدام جميع الخلق ماشى هزنى

قدام جميع.. الناس صبورہ ومؤمنہ

وصحيح صبورہ ومؤمنہ

لكننا..

يا أمهات الأرض يقتلنا بكا أطفالنا

أكبادنا.. لو تبتم..

الدنيا.. راح تضحك لنا

لكننا..

ساعات ما نقدر شئ..

نهادى البسمه للطفل الصغير

لما تضيق من وشنا

وساعات نحاول..

نرسم البسمه..

وفى القلب الكثير

وانا طفلى عودته بطول عمره..

أخاف دايما عليه وأحميه

واضحى - لو عمرى يهون - وراضيه

والمره دى..

متكفنه

هجم على إبنى المرض

ورينا بييده الشفا

أصلى واد عى له..

ووشى مفسول بالبكا

وان شفته لحظه.. إشتكى:

أطمئه..

واضمه حتى يختفى..

غول القلق
يارب..
نجينا جميعاً م الفرق
يارب نجينا جميعاً..
م الفرق.

١٩٩٥ / ٧ / ١٠

المركب

فى البحر المركب وسط الموج
والموج غدار
وف وسط البحر:
الرعب ينبت جوه القلب
مايفرق ليل ونهار
وركبنا المركب مش علشان نصطاد
وتوكلنا على الرزاق
ولا إحنا فريق شجعان.. جدعان
وحنغطس وسط البحر.
ونخرج بالمجهول
ولا حتى غرضنا نلف الكون
نتمتع باللى سمعنا عليه م الغير
مركبنا خدتنا...

عشان مانطير ونعدى الموج
وهناك ع الشط:
نقرا المكتوب
من غير غجرية تبين زين
ولا تقرا الكف..
ولا شايه ف إيديها ودع
يتوشوش..
قبل ماينزل فوق الرمل.
لكن ع الشط دا نلقى طبيب
وجهاز اقرب للسحر
يقرا اللي ف قلب القلب
وفى قلب الدم..
وجوه المنخ
ويامر طبيب الشط
يتكلم.. ويقول ع العله فى اى مكان
وازاى ممكن يتداوى الإنسان
وبرغم دا كله..
بيعجز برضه ساعات
وينسأل: ليه يا طبيب؟
يتحير.. ولا يقدرش يقول أسباب
علشان مالقاش لسؤالنا عند جهازه جواب
بنفتش جوه قلوبنا وهى بخير
وينعرف إن الشافى برغم دا كله عظيم وكبير
وبإن الطب وكل العلم... يادوب أسباب.
يادنيا؟

١٩٩٥/٩/٢٠

جری بس ایہ؟

اُمل ف عینک
تخبی عیونک
افتش ف صوتک
وحتی فی سکوتک
باحس.. ویا عرف
ایہ اللی مداریه

یا عمر اشتریتہ
بعمری.. ویا ریتہ
مایخلصشی بدری
وانا اوفی بندری

وهمى أبيه
ولا اسأل عليه

يانور الليالى
ياقمره قبالى
بتضحك.. تلالى
يغيب انشغالى
إذا غبت قوللى

أنور بابه؟؟
باخاف لما تضحك
وعينى ترف
ولو تبكى.. دمعى
مايقدر يجف
يافرحى ياتايه
بادور.. والف
ومالك يادنيا
جرى بس إيه؟؟

١٩٩٥/١٠/١٥

ياريت اقدر

ياريت اقدر
اجيبك فرح عمره طويل
واجيبك عمر ما يقصر
يانور العين
يا حلم سنين
دا لحظة مانت تتألم
أحس بقلبي يتعصر.

ياريت اقدر
أصدق بكرة لو يحلف
ماعاد يخلف.. وراح ينصف
قلوب تعبت

ولا ملت
دا منا الصبر يتعلم
وايه نعمل لمتقدر؟

ياريت.. ياريت
من القلب اللي بات مديوح
وكاتم جرحه مش بيبوح
عزيز عيني
قصاد عيني
وخوفي إنه بكره يروح
يروح عمرى معاه.. واكثر.

١٩٩٥/١١/٥

عيد ميلاد حزين

وف يوم نجاحه ف عز أفراحه
الكل راح ونساه
ولا حد زاره اليوم ده أو هناه
وف عيد ميلاده
الشمع طال صبره
ولا حد - برضه - طفاه
قلب الفرح يومها انعصر
ع اللى مالوش فى الفرح
هرب الغنا علشان مافيش مرازيك
بعث القمر لى حزن موال
(ياقلبي يا حزننا
ع اللى مالوش فى الفرح
ع اللى ما طاب م الجرح

وجاله جرح جديد
ع اللى اتحرم م العيد
والعيد قصاد منه)
قال الحزين: حظى..
أسعد قلوب الناس
وازرع لهم أفراح
وهم ينسونى
ولما أندهم
فى عيدى.. مايجونى
وأنا بحر أحزاني دائماً يفرقنى
وشمس أفراحي دائماً تفارقنى
ودمعى من ظلمكم..
دائماً يسابقنى.

١٩٩٥/١٢/٢٢

العمر لعبة

أنام ازاي
وهي صاحي ماينام
إذا سهيتي عيني..
وغمضت مني..
بتفجعي كواييسي
ماعاد لي حق في الأحلام
أنام ازاي
وقلبي، نبضي، نور عيني
بيتالم.. ويتقلب.. ويتعذب
وياما كنا والأفراح سوا صحبه
كأن العمر دا لعبه
مافش صعبه
بتلعبيها السنين.. وكثير بتكسيها

وتسرق كل شيء منا.. وتحرمنا
ويتبقى مع الله باقى م الأيام
صور ماضى بتكلم
وتحكى لجل نتالم.

١٩٩٥ / ٨ / ٤

باريس

عمري ماكنت اتمنى اخطى لحد باريس
بس المرض القاسى اتحكم
قالوا دا عيب
جوه مغ ضنايا قديم
استغريت
صرخت وقلت:
بس دا ابني نكاؤه شديد
قالوا : نكاؤه سبب العاهه
قلت صحيح سبحان الله!!
العبرى ينصاب فى المغ
واللى نكاؤه قليل مرتاح
ليل وصباح
ادعى واصلى

واطلب م اللى خلقنا يزيح
وادى ضنايا
مرضه حكاية
أتمنى تبقى لها نهاية
خير وسلام.

واما حكيث
قلت: يا بنى سافرت باريس
لجل علاجه
بدل المره خمس مرات.
قالوا: يا بختك إنتى وراينك
حد يطول يوصل لباريس؟
خفت أقول عقبالكم زى
أحسن يقبل ربى الدعوه
قلت يارب يا عالم بى
تكفينى شر الحاسدين
تشفى لى إبنى وترحمنى
م اللى يا بنى مش حاسين
ناس بتمشنى على البنور
تحسد رجلين جوه الطين

١٩٩٨ / ٨ / ٩

رسالة إلى مسئول

دا حلم حيرحل واللاسراب؟
دا انا كل ما أوصل عند الباب
القاء مقفول
ووراه مسئول
زارع أبوابه من الحراس
ومشائق صبر لكل الناس
إلا الواصلين
أنا خفت أشق التوب ما القاش
توب غيره جديد.
الناس بتجيلي لحد الباب
تلقى الترحاب
والبسمه.. وكلمة حق
الناس بتجيلي شاقه التوب

بخيوط الحب أداوى الشق
الناس بتجلى
ومهما بتطلب أنا ما أقدرش
أقول لها لا
وأنا طلبى محال؟
واللا حيثحقق زى ماقال..
فى منامى الحلم؟
لا أنا باطلب جاه
ولا باطلب مال
أنا باطلب حق لابن مريض
مستنى إشاره على الأوراق
مشتاق يتأكد..
إن الأرض ماهش بايعاه
وتراب الأرض أما بيتشم
بيفوح المسك
مشتاق
لحقيقة تزيل الشك
الأرض دى ليه ولك؟
واللا احنا ماعدنا ولاد الأرض؟؟

١٣ / ١٠ / ١٩٩٩

يارحلة يامرہ

الفرح سافر من زمن
من يومها واحنا بنمتحن
صبر وإيمان.



هزم المرض صبر الولد
ساعة مازمه له الشباب
رضعته من صبرى..
مرار الصبر
قويته بإيماني وشال الحمل
ومشيت أنا وابني
طريق مسدود
لا نعترض
لا نضج.. ولا بنكل

طول الطريق نسأل على غيره
وندخله ونمشيه
نتمنى نوصل بيه
لكنه بعد الصبر
نلقى طريقنا سد
الهم يكثر.. والقدم ينهد
والولد تجرى دمعته
ويشق توب الصبر
بالصبر اعيد التوب
والبسّه للولد
نسأل..

ونمشى ورا الدليل
يخلص نهار.. ويبقى ليل
ومنانا...
نوصل للطبيب



جبت الخبر
الفرح جاى بعد الغياب
قام انفرد ولدى اللى شاب
من كتر ما عاشر هموم
رقصت دموعه ع الخدود
إتخبطت كل الحروف
فتش على ورق الزينات
كان جابه لجل يعلقه
يوم عيد ميلاد
ماقدرش لما الفرح غاب

ساعة ما عدى ف مخه سهم..
من المرض

ما عادش للزينة ميعاد
ولا تورته..
ف يوم عيد ميلاد
حتى الطبيب...
ماقدر يروح له فى الميعاد
مهو أصله محتاج التمن
ومنين يجيب؟
واللى معاه يدى الطبيب
وحق ولدى عليه
مشغول ومش دارى
واليوم سمعنا صوت
بشرنا بالأفراح
أنا وابنى راح نرتاح
من الهموم والحزن.
كفأياك ياليل نواح
لاشموع ولا أفراح..
من حقنا مره؟
يارحله يا مره
نفرح ولو ذره
خوفى على ابنى من المرض والهم
خوفى عليه أكثر..
من فرحه لو ماتتم.

١٩٩٥/١٢/٢٩

ماهش باليد

باحبك..
شيء ماهش باليد
وخوفى عليكى ماله حد
وليه ترمينى فى طرقات
طويله و.. آخرها سد؟

.....
بكيت لحظة هزيمتك
وافتداكى الدم
بكيت من فرحى يوم نصرك
وانتى هرم
بكيت اليوم..
وانا حانى لى ضهرى الهم
أعاتبك..

واللا أحاسيك؟
تكونى أم كيف.. وانتى
تنامى وتحلمى.. واحنا
تفرّنا همومنا كل ليل كوابيس؟
تكونى أم كيف.. وانتى
معاكى، وإيدنا مش طايله
ولا تديش؟
تكونى أم كيف والولد لماين واشكى لك
عيونك ماتخاف لحظة على ولدى؟
ومهما تشوفى ماترديش
قفلت القلب على حبك
قفلت القلب على همى
وناديتك.. وانا باصرخ
وثانى
باكلك بشوئش.

.....

وشرفتك أمام الكل ولا قصرت
وعلمت الصغار..
يقروا حروف اسمك
ويعملوا منه غنيوه
ويبدروا كل حباته
فى كل النبض.
واديهم كبروا.. وانتى ف دمهم زى
وبرضه..
كاسره خاطرهم

إيديكى فوق ودانك...

ينخرس صوتهم

عيونك غمضت لما

فتحتى الباب..

وشفتيهم

وكان الباب بقاله سنين

عليه القفل والحراس.

.....

قولى لى بس أعمل إيه

وحبك شىء.....

ماهش باليد.

١٩٩٦/١/٢

اللى وقع.. لوقام

لوئُحنا فى الغنوه
وطريقنا مامشيناه
حتبدل الايام
وتنقتل احلام
دا اللى وقع: لوقام
ممكن ف يوم .. يوصل.



مهما بنتالم
وديموعنا تتكلم
نشتد... مانسلم
م الشدة نتعلم
نقوم كمان مره
نصبر على بكره

دا اللى وقع لوقام
ممکن ف يوم.. يوصل.



کتفتنى یازمن
ولا همنى التکثیف
غرقتنى ف الحزن
علمتنى التجديف
ویاهم.. مهما الهم
یخنق کرات الدم
دا اللى وقع لوقام
ممکن ف يوم يوصل.

١٩٩٦/١/١٠

حروف سجلها الألم

مهما يحصل

مهما قالوا

إن أولادك نسوكي

أو باعوكي

إوعى يا أمه تصدقيهم

إوعى تبكي

اللى قالوا هم دول اللى باعوكي

هم دول اللى نسوكي

أما أولادك : بخير

بس يمكن مخنوقين

من جبال الحوجه يا أمه

بس يمكن قلقانين

بدهم يبقوا سواعد

تبني أهرام شكل تاني
بدهم لو حلموا ما تهدي الأمانى
وانتي دايماً تايهه عنهم
بينادوكى بالغنا
ويدادوكى
بعد ما كنتي تناديهم وتناديهم
ليه ما بتردى عليهم
تعبوا.. هجوا
صرخوا.. ضجوا
تاهوا فى كل الشوارع
تاهوا فى كل البلاد
نسيوا أساميهم وأحلام السنين
بس ما نسيوش حروف اسمك وصورتك
قالوا يا أمى وحشتينا..
وإمتى تلمى لحملك؟
إنخرستى
نادوا حتى انبح صوتهم
ما سمعتى
زى ما تكونى مش انتى
اللى شلتيهم فى بطنك
واللى سقتيهم بشهدك
ليه يا ست الكل ما عدتيش حنونه؟
ليه ما عدتيش..
تاخدى أولادك فى حضنك؟
واللى رايح.. واللى جاي

يحلف ان الولد بايع للامومه
والله اولادك بخير..
مهما يجرى..
ومعذورين
لو تعودى يا امه تانى
تندهى ع الولد من كل البلاد
تجمعهم
تمسحى دموعات عنهم
وتراضيه من جديد
راح يكون اليوم دا عيد
عيد.. ح تنقاد له الشمس
اه يا امى.. ايه اقول لك؟
اوعى تبكى م الندم
صديقنى..
لو ما كانش قاتلنى حبك
ما نطقت حروف.. وسجلها القلم
ما نطقت حروف.. وسجلها الاكم.

١٩٩٦/٢/١١

شوق

أقسمت باسمك يا بلادي فاشهدني
إني لا بدئي مال ولا سلطان
أنا بدئي تبقى لي صديقتي المخلصه
ما تطوكيش الليل عليه
وانتي عارفه اني..
ياحب الشمس والنور والنهار
ما تفرطيش فيه
لا افرط يوم ف صبري واشتعل
دا انا كل ما اجي أدق بابك
ما احتمل
نكران وجودك
ما احتمل تأجيل ميعاد..
الحمل زاد

والصبر مش قادر يكفى..
شئ جديد
دا انا مش با اطلبك بالمحال
ولا شئ ماهش حقى.. وحلال
وازاى اقتل شوقى فى النبض الحزين؟
دا انا شوقى أصبح كالجنون
مالوش قانون
وانتى ما زلتى كل يوم
راسمه السحابه ع العين.

١٩٩٨/١١/١٨

حسادنا والمركب

انا والزمن ف سباق
أجرى ورا الايام
تجرى ورايا ايام
مره انا اسبقها
مرات بتسبقنى
يا صبر سامحنى
لو يوم شعرت بانى مش طايقاك
أو مرة جيتنى وقلت مش عايزاك
ونويت اشق التوب
لكنى بارجع لك.. وتانى اتوب
واغنى فى الموال
واقول: يا صبر جميل
ساعدنى امشى بالحمول.. ولا اميل

مهما يطول الطريق
خليك تملأ صديق تحلى المر
تخلي الصعب من نفسك يلين ويمر
تخلي دمع عيني م الاكم ما يفر
باطاوعك..

لجل ما تفرقش مركبنا
وكل ما ييجي بكره جديد
همومنا طرحها بيزيد
ووسط الموج بتتمرجح
وناس ع الشط حاسدا نا
تشوفنا فزنا بالمركب وبالرحلة
ولا بتشوف مراكب..

إلا مركبنا
ولا يعجبها جوه المركب الا احنا
على قلوبنا نخط إيدينا ويندعى
تعود المركب بينا

تهدى تانى فى المينا
دا من كتر اللي عمله الموج
سنين فينا

نسينا شكله إيه الشط
نسينا يعنى إيه نفرح
نسينا يعنى إيه نرتاح.

... ..

يا موج البحر يا قاسى
يا سارق منّا الأفراح

حتقدر يوم
ترجع لى اللى خدته وراح
وتشفى جرحنا بالملح والميه؟؟
حتقدر.. عندك النيه؟؟
أدينا جوه مركبنا
معانا الصبر
أدينا بعد ما شربنا كثير م المر
مازلنا نلف بعيونا
على القمره ف عز الليل
وينغنى لها.. وبنحلم
مازلنا كل ما تعالى
يا موج البحر
بيعلى بالدعا نبضى.. ويبصرخ
لحد القلب ما يشعر بنبض أمان
بنحلم.. كل يوم نحلم نعود للشط
بدون ما حد جوه المركبه يفرق
وفوق الشط حسادنا بيتهامسوا
ويبشاوروا على المركب.

١٩٩٦ / ٧ / ٩

تو كان باليد

رغم انه كبر بصحيح
شايفاه.. لسه ماكبرش
رغم انه بقى له كلام
يرسم أحلام
يحكى لى ساعات.. أضحك
واتمنى يطول الضحك
وساعات القلب يخاف
رغم انه ماهش خواف.
... ..
وانا كنت زمان
باحكى له عشان النوم هريان
فيجيله النوم
وبأجمل بسمه..

على وشه الاجمل م القمره..

يحضن دبويه

باسم الله.. الحارسين

عينيه الحلوين.

وروموشه الصنفين

يلتقوا الاتنين بعد الحواديت

القانى باقول:

(تصبح على خير)

بالهمس..

عشان الحلوما يقلقش..

ولا نومه يطير

أهدى له البوسه على الخدين

أراضيه الاتنين

وأطل ف وشه واكبر

يتبسم أكثر

ويفك إيديه من ع الدبدوب

ولا عاد يشعر بوجودى

القانى بافكر..

وياكلم نفسى.. وباقول:

معقول..

بكره يا محمد راح تكبر

وبدل ما احكى لك تحكى لى؟!

... ..

واتصور إنه كبر بصحيح

واتصور إنه حكاى عن المحبويه

وبقاله بدل الدبدوب اللعبة دبويه

أتصور.. وأتصور.. وأتصور.

... ..

أتأريه دا كبر بصحيح

فضلت أفراحه وأفراحي

ترتوى م الحب وتكبر

وف لحظه..

ما عادتش بتقدر

رفضت ترتوى أحزان وهموم

كان قلبه صغير

لكن مليون بفرح ألوان

دلوقت.. الفرح ما عاد له ف قلبه مكان

واستنى ينام

ويحاول أحكى له..

بيفضل سهران

وعينه بتبص ف كل مكان

بيدور على شئ راح

أتعصر من جوايا

وائن

لو كان باليد

أنا كنت ازرع له

من الأفراح بستان

لو كان باليد

أنا كنت ازرع له..

من الأفراح..

بستان.

١٩٩٦/٤/١٢

معجزة

اللى يعرض هو ربي
واللى يشفى هو ربي
لا اعتراض على القدر
لا احتمال..
للمموع فى قلب ولد
لا تلو سونى يا ناس
لولا إنَّ الرب رب المعجزات
والشفيا للولد أصبح معجزه
لانتهى العمر اللى جاى
وانتهيت من عمر فات.

١٩٩٨/١٠/٤

مهما اتخفق

مهما اتخفق..

لا اشتكى.. ولا أنذل

واضحك ف وش الكل

واللى ف قلبى

يشهد به ربي.

* * *

ترحل سنين

وتعود سنين

ما أقول يا مين

صابره.. وعمري ما امل

مهما اتخفق..

لا اشتكى.. ولا أنذل.

* * *

توسدنن ناس
توزن لن ناس
اوسن امل وناس
واللل نوسه تطل
مهه اتونق..
لا اشونق..
ولا انذل

* * *

وطلون شائلانن
ولولمن واودانن
والسكه شاعلانن
وائلفه وطلون تول
مهه اتونق..
لا اشونق..
ولا انذل.

۱۹۹۷/۵/۲۴

الصبر.. صديق

إتعلمت ما أقولش الآه
مهما أحس بأى ألم
شايه حمولى على الكتفين
ماشيه أجرجر فى الرجلين
فوق الشوك بتدوس يا قدم

... ..

كل ما أقول هانت.. وخلص
تحنى كتافى حمول الهم
وانا والصبر صحاب من عمر
ولا باشكيش من طعمه المر
راح وشكائى وقال: (مليت
كل ما احاول أبنى واعلى
القانى ف لحظه اتهديت)

كل ما اخطى ارفض أرجع
وأعافر.. وامشى لقدام
بس الريح دائماً فى الوش
حالفه لأخسر أى سباق
وانا من غير حلفان باوعدها
إنى حاكمل
مهما اتحمل
مهما طريقى الصعب يطول
ولانى ما اعرفش أترجم..
خط الكف
ولا افسر بن الفنجال
باتحايل ع الصبر يطول باله على
يمشى معايا.. إيديه فى إدى
لجل النفس اللى بيتمشور
راح.. جى
يفضل صابر ولا يتعبش
لجل عيونى اللى بتحبس دمعاتها..
وخايفه منها تفر
ما تكشرش
لجل أحس بقوه
بيها أقدر اخرج أى غريق
لازم يبقى الصبر صديق
لازم يبقى الصبر.. صديق.

١٩٩٦ / ٧ / ٣

يكفيننا بنعافر

طعم الهزيمة مُر
طعم الهزيمة صبر
والصبر لما يطول
يقصر معاه العمر
حملت فوق لاكتاف
حملت فوق الظهر
حملت فوق لاحمال
وركبت موج البحر
طلبت ف عين الموج
نبت ف قلبي الرعب
الشط لسه بعيد
والحمل ما يخف
يا مركبي فينك

إنت ومجاديفي؟
غمضت ليه عينك
ولا عدتي بتشوفني؟
الموج بيحلف لي
وأنا حالفه ما ح اسلم
ويكل أحمالي
حاوصل لحد الشط

* * *

يغلبنى مره الموج
تجري دموع عيني
يشربها موج البحر
القل ويا الصبر
بيقووا دراعيني
أضرب ف موج البحر
موجه ورا موجه
المح سراب الشط
أنده على فرحي
يرن صوت الموج
ضحكه ورا ضحكه
أكره حروف الخوف
وليل مالوش ف النصر
طعم الهزيمة مر
طعم الهزيمة صبر
ياليل مخاصمه البدر
ذنب السهاري إيه.

* * *

غطوا الضلام بالنور
المركبه تفتح
تعرف طريقى فين
جواها اخف الحمل
واغنى للمجاذيف
ياصبر يا مجداف
الموج مالوش آخر
اللى غرق سلم
وحلفت ما أسلم
مهما يكون الموج
الصبر وصبرنا
والحمل اهو شيلنا
وان كنا ما وصلنا
يكفيننا بنعافر.

قلبي ماهش خوآف
والشط فين سافر؟
واللا حموله جبال

١٨ / ٥ / ١٩٩٨

صدر للشاعرة

دواوين شعر:

- ١- شهر زاد - الهيئة المصرية العامة للكتاب ١٩٨٨
- ٢- عرايس الشعر (مشترك) - مديرية الثقافة بالاسكندرية ١٩٩٣
- ٣- ضفاير الشمس - الهيئة العامة لقصور الثقافة ١٩٩٦
- ٤- الرسائل - طبعة أولى - مديرية الثقافة بالاسكندرية ١٩٩٦
- طبعة ثانية - هيئة الفنون والآداب ١٩٩٧

قصص للأطفال:

- ١- الغابة النظيفة - طبعة أولى - دار المعارف ١٩٩٤
- طبعة ثانية - دار المعارف ١٩٩٧
- ٢- مدرسة الغابة - الهيئة العامة لقصور الثقافة ١٩٩٦
- ٣- حكماء الغابة (٩ كتب) - الشركة العربية للنشر والتوزيع بالقاهرة ١٩٩٧

هذا الديوان

ديوان (كاس دموع.. واحد) تجربة متميزة تقدمها شاعرة الإسكندرية نجوى السيد، تدور موضوعات قصائده حول معاناة أم لمرض ابنها، وعجزها عن مداواته، وتعبر الشاعرة عن ذلك من خلال مواقف مختلفة، وأفكار مبتكرة، وصور شعرية متفردة. ويضئ هذا الديوان مساحة جديدة في تجربة الشاعرة التي بدأت بديوانها الأول (شهر زاد) مروراً بدواوينها: عرايس الشعر، وشفائير الشمس، والرسائل، وحبات الحروف.

الفهرس

صفحة	
٥	الإهداء
٧	كاس دموع.. واحد
١١	طاقه فى السما
١٥	أمر الطبيب
٢١	نجوى
٢٥	المركب
٢٧	جرى بس إيه؟
٢٩	ياريت أقدر
٣١	عيد ميلاد حزين
٣٣	العمر لعبة
٣٥	باريس

٣٧	رسالة إلى مسئول
٣٩	يا رحلة يا مرة
٤٣	ما هـش باليد
٤٧	اللى وقع.. لوقام
٤٩	حروف سجلها الألم
٥٣	شوق
٥٥	حسادنا والمركب
٥٩	لو كان باليد
٦٣	معجزة
٦٥	مهما اتخفق
٦٧	الصبر.. صديق
٦٩	يكفيننا بنعافر
٧٣	صدر للشاعر
٧٥	هذا الديوان

رقم الإيداع بدار الكتب المصرية

٢٠٠٢ / ١٥٦٠٣

مطابع الاعتماد بكويتش النيل